





't Herenhoentien



Et is zommer!

Nog even en dan is et zommervekaansie. Hebben jim daor ok zoe'n zin an?

Wie d'r in elk geval wel zin an hebben bin Piepmoes, Klaos de kaeter en Miep, Klaos zien vrundinnegien.

En Ulf, Alf en Olf vanzels ok! En et kebooltermaegien Yori. Ze hebben et toch oe zo drok had de laeste tied. Ze bin drok veur jim an et wark west, zie.

Sietske, die ok altied an et Herenhoentien mitwarkt, het ni'je verhaelties over Piepmoes-en-die maekt. Jan en Bart, ok van dit kraantien maeken daor tegere mit al die beesten en keboolters moorie video-baanties van.

Volgend jaor brengen we die baanties bi'j jim op schoele, dan kun jim daor tegere mit juffer of meester moori naor kieken! Mar et wodt wel spannend heur! Piepmoes gaot zelfs een keer mit een echt vliegtuug vliegen! Mar daor verklappen we veerder lekker niks over.


In dit Herenhoentien staot ok weer een verhaeltien over Piepmoes. Piepmoes is een daggien naor de speultuun. Mar Klaos de kaeter is vanzels weer hatstikke vervelend. Saskia het veur jim prachtige spullegies bedocht en tekend. Op 'e achter-kaante van dit kraantien kuj' daor meer over lezen. Wat een moorie vlieger now? Piepmoes wil now zels een

vlieger maeken en daor in de vekaansie moori mit vliegeren. Vliegen en vliegeren, Piepmoes is d'r gek op!

Jan, Bart, Saskia en Sietske hopen dat jim een pracht vekaansie kriegen en weensken alle kinder die dommiet naor groep 3 gaon hiel vule succes toe!

Tot volgend jaor!





Piepmoes in de speultuun.

(Veurleesverhael deur Sietske A. Bloemhoff.)

Piepmoes is van-de-morgen al vroeg uut bedde stapt. Et is prachtig weer. De zonne schient zo lekker.

"Weej' wa'k doe?" daenkt Piepmoes, "ik gao naor de Lende. Dan gao ik een peer ronties zwemmen. Ik neem een stokkien bolle en een bekertien sukelaomelk mit, dan eet en drink ik dat nao et zwemmen lekker in et schaad van een gröspollegien op!"

En zo zwemt Piepmoes al op 'e tied in de Lende. Even laeter et hi'j zien plakkien bolle en drinkt hi'j zien sukelaomelk mit smaek op. Hi'j vint et heerlijk.

As alles op is, bedaenkt Piepmoes dat hi'j vandaege wel es naor de speultuun gaon kan, daor is et krek weer veur. Fluitende gaot Piepmoes op pad. Hi'j is best op schik.

Nao een posien is Piepmoes bi'j de speultuun. "Eerst mar es op 'e gliedebaene," daenkt et moesien. Daor klautert hi'j al naor boven en roetst even laeter naor beneden. Wat gaot dat hadde! Piepmoes klimt wel tien keer naor boven en lat him dan weer naor beneden glieren! Prachtig vint hi'j et. Mar op et laest wodt hi'j wel een betien muui van al dat geklauter, dat kuj' begriepen!

Piepmoes bedaat dat hi'j op 'e schommel mooi even bekommen kan. Tjonge jonge, wat gaot dat heerlijk. Daor fris ie wel van op, zo mit de wiend in je gezicht. Et moesien zit genietend om him henne te kieken.

Mar oe heden! Wat zicht Piepmoes daor inienend? Wie komt daor an mit de stat henne-weer slingerend? Een zwat beest mit een zwatte stat en een witte punte d'r an?

Klaos. Klaos de kaeter! En hi'j loert naor Piepmoes en slikt him al es om de bek. Wat een mispunt is die Klaos toch! Piepmoes schrikt him een hoetien. Hi'j kan nooit meer op 'e tied van de schommel ofkommen...

"Now pak ik jow, Piepmoes," mauwkt Klaos, "ik waecht hier krek zo laank tot daj' van de schommel kommen. Ok al zal et aovend wodden!"



tekening

Piepmoes begint te piepen, zo hadde as hi'j kan.

"Piep, piep, help, help," ropt hi'j, "Klaos wil me pakken."

Gelukkig heurt de gele gouwe him en vligt hadde naor Piepmoes toe. Hi'j wet wel een oplossing veur Piepmoes.

"Aj' weer omhogens schommelen, Piepmoes, dan moej' d'r hadde ofspringen. Dan moej' zo in ien keer op disse dikke takke springen!"

Piepmoes schommelt nog een peer keer goed henne-weer-denne en dan... springt hi'j zo op de takke, percies naost de gele gouwe! Knap heur, van zoe'n moesien, vienen jim ok niet?

Toch is Piepmoes nog niet hielendal veilig. Want hi'j zit now in een boom. En katten kun ommeraek goed in bomen klimmen. Klaos ok!

Mar weer bedaat de gele gouwe wat. Hi'j ropt gauw de doeve, die een aentien veerder in de boom zit te soezen en niks in de gaten het.


"Doeve, doeve," ropt de gele gouwe.

"Ja, wat is d'r," koerkt de doeve.

"Wil ie Piepmoes wel even naor huus toe brengen, hi'j zit hier bi'j me in de boom," vertelt de gele gouwe. "Hi'j is zo bange, want Klaos de kaeter wil him pakken. Ie bin wat groter, ie kun him vast beter dregen as ikke. Kom doeve, schiet op want Klaos is al vlak bi'j de boom!"

Daor komt de doeve al an. "Klim mar hadde bi'j mi'j op 'e rogge, Piepmoes, dan breng ik jow gauw naor huus toe."

Zo kan Klaos Piepmoes lekker niet pakken en komt Piepmoes veilig bi'j zien kesteel."




Et is al bijna donker!
 Et mannegien kan zien tente
 niet vienen. Kun jim him helpen?

Op 'e veurkaante hadden we et al even over Saskia heur
 spullegies. De olifant kreeg ze niet hielemaole klaor. Maeken jim
 die of? En helpen jim et mannegien zien tente vienen?

Van ien inlegvel kuj' een mooi meultien maeken.

Op et twiede inlegvel staon twie poppies. Die kuj' eerst kleuren en
 dan uutprikken of uutknippen.

Op et dadde inlegvel staon kleerties veur de poppen. Die moej'
 eerst ok kleuren veurdaj' ze uutknippen of prikken. An die kleerties
 zitten lippies. Aj' die naor achteren toe omme volen kuj' ze zo om
 de poppies henne bugen. Knip de vierkaanties mit et krusien d'r in
 uut en zet ze haoks onder de poppies. Aj' et goed daon hebben
 blieden de poppies staon.



't Herenhoentien

Utgever:

Intergemiontalike Bogeleidingsgroep

Hiemkunde in Oost- en West-Stellingwarf



An dit Herenhoentje warkten mit:

Jan de Vries



Bart Beltman


Saskia Douma

Sietske Bloemhoff



copyright HIEMKUNDE 1991 ofdeling onderwies
GEMEENTE WEST · STELLINGWAF





Aj' dit meultien maeken willen, hej' nog een stokkien en een spelde neudig. Geef eerst et vierkaantien mooie kleuren. Knip of prik et dan uut. Knip of prik vervolgens de strepies naor et midden toe in. Maek de driehoekjies mit stippels naor et midden toe vaaste deur de spelde op et stokkien te prikken En now mar hopen dat d'r wiend is!

